

Uunga siunnersuut: Allagaateqarfeqarneq pillugu Inatsisartut inatsisaat**Saqqummiussinnermut allakkiaq**

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisunut Ilaasortaq)

Siullermeerneqarnera

Naalakkersuisut sinnerlugit matumuuna Allagaateqarfeqarneq pillugu Inatsisartut inatsisissaattut siunnersuut saqqummiutissavara.

Inatsisikkut siunertarineqartoq pingaarneq tassaavoq kingulissat oqaluttuarisaanikkut najoqqutassaqartinneqarnissaat. Allagaateqarfiup pisortat oqartussaqaarfiini sullissiveqarfiinilu kalaallit piorsarsimassutsikkut kingornussaata ingerlatissavai ingerlateqqittassallugillu. Aamma tamanna atuutissaq allagaateqarfik toqqortanik, inunnit ataasiakkaanit sullissiveqarfinillu il.il. siunnersuummi § 1, imm. 1-2-imi ilaatinneqanngitsunit tigusaqarpat.

Inatsit atuuttoq 1998-imeersuuvoq, taamanikkut toqqortat amerlanerpaat pappialaagallarmata. Siunnersuummi paasissutissiisarnermi teknologi sulinermi pissusissamisuuginnartumik atugaalersimanera, aamma pisortat sullissiveqarfiini, allaffinni pappialanik atuiunnaariartuinnarfiuneranut atatillugu isiginiarneqassaaq. Taamaalilluni siunnersuut toqqortat elektroniskiusumik toqqortaasut pillugit aalajangersakkanik nutaanik imaqarpoq, tassuunakkut toqqortat tamavimmik, imaanngitsoq pappialat, båndiniittut assigisaanniittullu kisimik, aammali toqqortat elektroniskiusumik toqqortaasut nutaanerpaat kingulissanut isumannaarneqarsinnaanngorlugit.

Aammattaq aalajangersakkanik nutaanik, nalunaarsuiffeqarnermut toqqorsiveqarnermullu pilersaarutiniq suliaqartarneq kiisalu atortussaajunnaarsitsisarneq pillugit maleruagassanik erseqqinnerusunik Naalakkersuisut aalajangersaanissaannut piginnaatitsisunik ilanngussisoqarpoq. Nunatta Katersugaasivia Allagaateqarfialu taamaallaat najoqqutassatut missingersuutiniq tamakku pillugit malittarisassiornissamut manna tikillugu piginnaatinneqarpoq. Tassuunakkut Inatsisartut Ombudsmandiata atorunnaarsitsisarneq pillugu maleruagassanik erseqqinnerusunik, inatsit tulliani allanngortinneqalerpat aalajangersaasoqarnissaanik kaammattuuteqarnera akuersarneqarpoq. Erseqqissarneqarpoq maleruagassat allaffeqarfitsigoortumik aalajangersarneqartut Nunatta Katersugaasiviata Allagaateqarfialu tamatuminnga inassuteqareerneratigut aalajangersarneqassasut.

Aamma pineqaatissiinissamut aalajangersakkat imarisaat ilaneqarput, maleruagassat malinneqarnissaat nalinginnaasumik qulakkeerniarlugu. Tassani pineqarput toqqortaait qanoq pineqarnissaat toqqortarineqarnissaallu, suliaqarfimmik nuussinermi toqqortaatinik nuussisarneq, isumannaatsumik atortussaajunnaarsitsisarneq, toqqortat tunniunneqartinnagit torersarneqarnissaat pisariaqanngitsortaasalu piiarneqarnissaat pillugit maleruagassat, aamma toqqortaait nutaanngitsut atorineqanngitsut tunniunneqartarnerat pillugu maleruagassat. Aammattaq aalajangersarneqarpoq pillaammik akiliisitsinissaq pillugu aalajangersakkat,

allaffissornermi maleruaqqusat Inatsisartut inatsisaat naapertorlugu atuutilersinneqarsimasut tunngavigalugit aalajangersarneqarsinnaassasut. Kiisalu erseqqissarneqarpoq inatsisit naapertorlugit inatsisitigut pisussaaffilerneqartut aamma pillaammik akiliisinneqarsinnaassasut.

Taamatut oqaaseqarlunga siunnersuut Inatsisartunut oqaluuserisassanngortippara.